



Vazi la Haki ya Kristo

Mwenyewe

Nakupa shauri, ununue kwangu ... mavazi meupe upate kuvaa, aibu ya uchi wako isionekane.—**Ufunuo 3:18.**

Mavazi meupe ya kutokuwa na makosa yalivaliwa na wazazi wetu wa kwanza walipowekwa na Mungu katika Edeni takatifu. Waliishi kwa ukamilifu wa kushirikiana na kutimiza mapenzi ya Mungu. Nguvu zote za upendo zilitoka kwa Baba yao wa mbinguni. Nuru laini na njema, nuru ya Mungu iliwazingira watakatifu hawa wawili. Vazi hilo la nuru lilionesha jinsi walivyovikwa mavazi ya kiroho ya uadilifu wa mbinguni. Kama wangekuwa waaminifu kwa Mungu nuru hiyo ingeendelea kuwazingira. Lakini dhambi ilipoingia, walikata mawasiliano yao na Mungu, hivyo ile nuru iliyowazunguka ikawaacha. Wakiwa uchi na kuaibika, walijaribu kuweka matawi ya mitini waliyoyashona pamoja badala ya nguo.

Hili ndilo wanalolitenda waasi wa sheria ya Mungu tangu siku ile Adamu na Hawa walipoasi. Wanajishonea matawi ya mtini kuficha uchi wao uliosababishwa na uasi. Wanajivika mavazi waliyoyabuni wenyewe, na kwa kazi zao wenyewe wanajaribu kufunika dhambi zao, ili wakubaliwe na Mungu.

Lakini hawawezi kufanya hilo. Hakuna ambalo mtu anaweza kubuni likaziba pengo la vazi la kutokuwa na dhambi lililopotea. Hapatakuwa na vazi la majani ya mtini, wala vazi lolote jingine la kidunia, litakalovaliwa na wale watakaoketi na Kristo na malaika zake katika karamu ya Mwana-Kondoo.

Ni vazi lile tu, ambalo Kristo mwenyewe; ametoa, ambalo litatuwezesha kudhihirika mbele za Mungu. Kifuniko hicho, vazi la haki Yake mwenyewe, ndilo Kristo atawapa wote wale watubuo, na kuamini....

Nguo iliyoshonwa katika mashine ya kutarizi ya mbinguni, haina aina yoyote ya ufundi wa kidunia. Katika ubinadamu wake wote Kristo alidhihirisha tabia timilifu, na tabia hiyo anajitolea kutupatia. “Matendo yetu ya haki yamekuwa kama nguo iliyotiwa unajisi,” (Isaya 64:6). Kila tunachojaribu kukitenda wenyewe kinachafuliwa na dhambi. Bali Mwana wa Mungu “alidhihirishwa ili aziondoe dhambi, na dhambi haimo ndani yake”....

Kwa ajili ya utii Wake mkamilifu amemwezesha kila mtu kuzitii amri za Mungu. Tunapojisalimisha kwa Kristo, moyo huunganishwa na moyo Wake, nia inaambatanishwa na nia Yake, mawazo yanakuwa mamoya na mawazo Yake, na fikra zinaletwa katika utii mkamilifu Kwake; hapo ndipo tunaishi maisha Yake. Hili ndilo jambo lililo na maana ya kuvikwa vazi la haki Yake. Hapo ndipo akituangularia, Bwana, hataona majani ya mtini. Wala uchi na vilema vya dhambi, bali vazi Lake mwenyewe la haki, ambalo ni utii kamili wa sheria ya Yehova (Lulu za Uzima, uk. 120 – 121).